

Yëkkuö skà kit Juan tö i' tã ide böt

2 Juan

Yëkkuö i' kit Jesús ttekölpa tsá e' eköl kiè Juan e' tö. Ie' tö yëkkuö skà kit döka tkël. Pë' welepa tö ibikeitsè tö ie' tö yëkkuö i' kit alaköl eköl ena ila'rla e'pa a. Erë ieltëpa tö ibikeitsè tö “alaköl” ena “ala'rla” e' wà kiane chè Skëképa Jesús icha erule wele. E' kuëki welepa tö ibikeitsè tö ie' tö ikit Skëképa icha erule wele a.

S'kitó'ukwakpa dë'mi Jesús mik erblökwakpa shuá e'pa kè tö s'wöbla'weku' Jesús tté buaè e' wa. Ie'pa éna Jesús mik erblökwakpa tsakmi ñala sulusi ki. E' kuëki Juan tö yëkkuö i' kit pë' ñekkëpa biyó choie ie'pa a. Ñies ie' tö iché tö Jesús mik erblökwakpa kawötã ñi dalëritsök.

Shke'wè

¹A tayè^a, be' shukitbak Skëköl tö. Ye' kiè a' tö blë'këképa, e' tso' yëkkuö i' shtök be' a ena be' ala'r a. Mokië a' dalër taië ye' éna. Ñies wépa tö Skëköl tté moki e' kló'wé, esepa kos éna a' dalër taië. ²Tté moki e' tso' se' kos er a, e' tso' se' tã kekraë, e' kuëki sa' éna a' dalër taië. ³Skëköl dör S'yé ena ilà Jesucristo, as e'pa er buaè chò a' a ena a' saù er siarè wa. As ie'pa tö sene bèrè mù a' serke tté moki a ena ñi dalëritsè a, esepa kos a.

Se' kawötã ñi dalëritsök

⁴Ye' wã ijchenewã tö be' ala'r welepa tso' S'yé tté mokië, e' wà dalöiök buaè wës ie' tö ime'at se' a es. E' tö ye' ttsë'weke buaë. ⁵A tayè, ye' tö be' a ichè tö se' ulitane kawötã ñi dalëritsök. Tté e' kè dör tté dalöiëno pa'alì shtekeyö a' a. E' dör tté yënebitu se' a tsawe e'. ⁶Se' serke yësyësè wës Skëköl tté dalöiëno tö ichè es, e' tã se' tso' Skëköl dalëritsök mokië. Ie' tté dalöiëno tö ichè tö se' kawötã ñi dalëritsök. Tté e' ttsë'bitu a' tö tsawe.

^a1.1 tayè: Es Juan tö Skëképa icha erule a ie' tso' yëkkuö i' shtök e'pa kiè.

S'wöbla'ukwakpa kache tté wa

⁷Taië s'kitö'ukwakpa tso' ká wa'ñe. Ie'pa tö icheke tö Jesucristo dë', erë kè idë'bitu s'ditsöie. Yi tö icheke es, ese dör s'kitö'ukwak ena Cristo Bolök. ⁸A' e' kkö'nú pë' esepa yöki as sa' kanëblë' a' shua, e' kè wà weirwa éme. Ye' ki ikiane tö iské mú dò a' ulà a sēraa.

⁹Ttè wa Cristo tö s'wöblao', e' kè klö'wëku'ia yile tö erë ikí kuötkékaitö taië kos Cristo tö iyë', e' tsata, e' ta ese kè batsulewā Skëköl mik. Erë yi e' tkëwā darërëë Cristo ttè mokí a, ese batsulewā S'yé mik ena ilà mik. ¹⁰Yile de a' ska' kè wā Cristo ttè mokí mir, etā kè ese a wēshkē char, kè ishke'war. ¹¹Yi tö ishke'wé, ese tö ì sulu wamblekeitö e' kimeke. E' kueki esepa kè shke'war.

Juan e' chéat

¹²Taië ye' wā íyi tso' chë a' a, erë kè ye' éna ishtak yëkküö ki. Ye' mú mi' a' ska' ta se' tö iwà chëmi ñi a. Es se' ttsé'rdaë buaë shütē.

¹³Be' ël shukitbak Skëköl tö, e' ala'r tö be' shke'wëmi.